

四庫全書

集部

欽定四庫全書

集部

松隱集

目錄
卷一至
四

詳校官庶吉士臣翁樹培

侍讀臣孫球覆勘

覆校官中書臣田戶衡

校對官助教臣汪錫魁

謄錄監生臣沈 供

欽定四庫全書

集部四

松隱集目錄

別集類三 宋

卷一

賦

卷二

古樂府

卷三

古樂府

卷四

古樂府

卷五

古樂府

卷六

古樂府

卷七

古詩

卷八

古詩

卷九

古詩

卷十

律詩

五言

卷十一

律詩

五言

卷十二

律詩
七言

卷十三

律詩
七言

卷十四

律詩
七言
此卷原闕

卷十五

律詩
七言

卷十六

律詩

七言

卷十七

絕句

卷十八

絕句

卷十九

絕句

卷二十

絕句

卷二十一

詩

卷二十二

詩

卷二十三

書

卷二十四

書

卷二十五

劄子

卷二十六

劄子

卷二十七

劄子

卷二十八

頌

卷二十九

贊

卷三十

記

卷三十一

記

卷三十二

題跋

卷三十三

題跋

卷三十四

祭文

卷三十五

墓銘

卷三十六

墓銘

卷三十七

禱著

卷三十八

長短句

卷三十九

長短句

卷四十

樂府句

臣等謹按松隱文集四十卷宋曹勛撰勛字功顯陽翟人宣和五年進士官至昭信軍節度使事蹟具宋史本傳是集前載正統中大理寺正洪益中序稱為勛十世孫參所藏朱彛尊亦嘗從其家借抄迎鑾賦七篇謂勛之子姓保有此卷半千餘年勿失後復得文集

錄之蓋止有家傳抄本從未鋟板也勛嘗從徽宗北狩奉密詔南歸後使金迎宣仁太后頗著勞績故其詩文多可藉以考見時事詞筆亦清雅可誦惟上呂頤浩書欲結劉豫以圖金則其計失之太疎然奉使之功實有未可盡沒者正不可以是槩訾之矣集中間有脫篇落句第十四卷已佚不存樓鑰攻媿集有所作松隱集序一篇此本亦失載蓋其後

人傳錄僅存故不免於叢殘失次今釐訂訛
舛仍其所闕著之於錄焉乾隆四十一年五
月恭校上

總纂官臣紀昀臣陸錫熊臣孫士毅

總校官臣陸費墀

松隱集原序

予在邑庠時聞先師今趙府長史木菴趙先生常云吾鄉宋太師譙國忠靖公松隱文集蓋嘗觀之心切嘉敬其文藻華麗炳炳琅琅昭如日星豈珠玉錦繡之可比倫矧其忠貞懿行表表於青史間又烏可企而及哉予深紀胸臆而不及拜觀之深切自歎嗣後予膺貢至京師則職鳳池叨陞大理官侍從兩京者三十餘年適因冒感風症承恩賜歸醫治頗得清暇其十世孫曰參者

自幼情交因詣訪焉得請而拜觀之集計六冊通四十卷字字精明無少脫落洵能躬閱藏之不啻如拱璧而亦不輕示於人故宛然若新噫由宋迄今歷四百餘年然非忠靖公世有賢子孫能崇儒尚古寶愛恪守先人之手澤於悠久寧有不失落而弊壞也哉其於尊祖敬宗之道至深切矣抑又聞之其中葉頗衰不以金玉竒玩為事而以斯集為至寶者可謂知所重矣誠可謂賢子孫矣吁作之於前者固難而守於後者為尤難後之

為子孫者宜志夫忠靖公之志為可勉亦當以心夫參
之心為可勸斯不墜夫家世之所永傳予故樂識於是
集之末以堅其志云時大明正統五年歲次庚申春三
月朔旦大理寺正玉湖洪益中序

卷之二

序

欽定四庫全書

松隱集卷一

宋 曹勛 撰

賦

迎鑾賦

紹興十一年十月內蒙召赴內殿曰欲遣卿請還梓宮
太母天眷卿可治行奏曰臣自北歸仰荷大慈識擢寘
在左右惟期竭盡心力不愛髮膚以答知遇茲蒙委使
仰託聖孝泊天威所臨使事必濟况臣竊觀陛下建慈

寧宮預設宮中人物服御無一不備日夕祈禱早奉慈
顏固有年矣天地助順必如聖心願承聖略奉以周旋
上曰朕自頃被命出疆以至稟大訓即大位於今十五
年餘未始一日不北望庭闈永懷溫清幾無淚可揮無
腸可斷所以頻遣使者痛念親庭居患難久宜有以承
休命仰計上天亦相其為言已泣下左右皆掩泣上曰
汝見金主第云父母眷屬久蒙安存恩德至厚然歷時
為多霜露之感在人子何以堪處亡者未有葬藏之期

存者已逼桑榆之景兄弟聚族所存無幾今荷基緒居
人上每歲時節物風雨晴晦必北首流涕若於此時大
國垂念父兄子母家眷如初則舉族感德子孫相付不
忘於心誠恐老者有蒙犯不虞却為上國之恨卿以此
意盡言當有相應奏曰臣恭被聖訓已無可加損至臣
下意所不及陛下數語莫不曲當事情臣至則宣布聖
孝自應感動金人幸寬宵旰之念拜謝而出後同何鑄
入國至十二年方抵金國又西北行三百餘里名春水

引對開先殿具陳上所宣諭與何約伏地者三余為義

氣所

義氣所三字
一本作憤

激語次淚霑朝服又陳本朝頃有

四德二功於上國上國乃稱弟以答本朝

答本朝三字
一本作奉兄

非若契丹於上國徒有仇怨既歷舉六事金主與烏珠

左右大臣皆首肯意極惻然已而烏珠傳金主語云好

待與大臣評議歸館聽旨馬上館伴翰林學士張鈞曰

帝與國

一作丞

相見公所言激切志在忠孝甚喜以從來

南使未有開說曉然如此者皆實事必有恩也是晚諫

議大夫耶律紹文大理卿楊仲脩到館傳金主云早來
使人所請宜允出答國書相示退後南望闕庭稱賀老
夫獨號慟淚不能止也亦痛定而然回程後奉迎還

還字

一本作皇太后歸四字

闕踰旬請祠瀝懇再三方蒙上恩許居天

台山作此圖

一作小

賦以傳家太尉昭信軍節度使譙國

公曹勳叙

受命

僕幼稟嚴君之訓兮詩禮是傳約已惟孝謹兮忠恪是

肩冠歲以此道際遇徽考兮自九重而從幸北邊不以
艱棘易操兮在難益虔及密奉徽考宸翰以勸進兮獨
月涉星奔以南還荷上聖恩俾列班聯蒙訓辭之哀切
祈梓宮慈寧於北轅恭仗漢節持禮首燕

啓行

逝矣金源重譯北陸始虔劉兮耶律繼侵犯兮帝畿終
叛約而係累民庶復逼擁翠華於旌旗嗣聖仗鉞再造
洪基敵厭兵而請盟許鄰壤兮淮湄申命秉信夙夜載馳

仰上聖兮永懷溫清撫四海兮靡日不思感臨遣兮丁
寧誓捐軀兮指期

見接

一本見接在
北渡之後

即路北指涉江整淮理無南首地闢天開至泗濱而就
驛與伴使兮裴回肆筵既歛詢予茲來略陳大綱北使
捧手而哈曰何其艱哉盟未歷時理難遽諧僕謂曰我
國家以聖繼聖布恩禮兮孔該報施一作施報合度爾宜廓
懷

北渡

晨起攬轡思

一作喜

臨故汴所過郡邑人物皆漢慘神都

兮東入望雙闕兮魂斷泣經舊止路人驚盼悵予懷兮

靡陳豈止黍離之歎麾拂全趙旌簇燕雁指扶桑兮萬

里值隆冬兮雪漫寒幾墮指噤欲神散涉遼河兮航混

同逾御林兮抵春甸敵方大為海東青之擊挿天鷲以

自薦

傳命

即日入謁周衛在庭奉書幣於穹帳感日色以重明肅
衣冠以儼若陳舜孝之懇誠擴聖意兮縷及如天語之
丁寧伏蒲三至旁觀竦聽余淚在服敵惻然者再兮果
允言以欽承

許還

仗威靈兮下九閭格強敵兮答辭甚溫紛館舍之蹠蹠
傳廬帳之有言以帝意之誠孝其前事兮莫論太母康
福宜奉晨昏梓宮在窆願歸寢園即以仗衛遣使駿奔

速余駕以入謝諭其國之酬恩敵曰一本無敵託寶隣
之堅持願無忘於子孫

回鑾

寒澹絕漠暖移朔雲啓五城之鑾馭滌陰山之征塵喜
動慈顏和氣回春彼君臣以奉辭眷接遇兮意真肅東
朝之儀物嚴車馬以備陳撤毳幕之蔽抑御玉輿之高
尊咸呼萬歲聲隘穹旻夾路氓庶仰德吾君

上接

有國所無迎還鑾輿渡江淮兮波平鼓迓揖兮鱗趨於
是天子儼法駕陳路隅事創見民傾都仰二聖之重會
浹八紘以歡呼天地清明子母如初

身退

居數日子以久留異地困於力役賀客在門固莫伸予
胸臆因念賀者以予之功也而功不可居談者以予之
能也而能者皆陛下之德又况妨功害能者豈容爾振
職念若併棄於薄勞曷若遠鑒於在昔於是再上疏求

骸骨殊恩灼知兮許奉祠而藏跡欣策蹇兮出修門揭
路隅兮誰復識

閑居

卜築天台松竹靚深侶方外之高士訪親舊之知音一
觴一詠有書有琴村歌社舞時以樂楮冠雲衲閒以尋
兒童漸長歲月任侵亦何知老之將至惟安天命兮行
吾忠赤之心

古樂府

補樂府十篇

并序

夫小雅廢而頌聲寢王澤竭而詩不作何則治亂之迹殊而哀樂之情變也故蕭韶歌虞鳥獸率舞靡靡歌桀淫洩流化是知吟詠情性關乎盛衰參諸天地俯仰疾徐捷於影響形於風化傳以為動天地感鬼神不亦信哉予讀古史見六代之樂及覽外傳自宓犧以至於商皆有其名而亡其辭唐元結嘗第而補之惜其文勝理異予志於古而不及見者也因申其名義補而發之庶

幾一唱三歎當有賞音者存焉云爾

帝宓犧氏之樂歌

罔咎以利民也

罔兮咎兮惟田漁時兮食兮民之湏以享以祀兮燔祭
有餘

一章章三句

帝神農氏之樂歌

豐年報帝功也

豐年告成百穀用登匏籩既盈黍稷既馨昭假是膺

一章章五句

帝有熊氏之樂歌

雲門紀瑞應而昭靈命也

於昭上帝靈命有赫其命維何卿雲五色翩如游龍萃
如山宗來臨來止惕然有顛惟欽惟畏迺祗迺庸肇建
官師神民肅雍

三章章四句

帝少昊氏之樂歌

九淵澤及飛沉也

鳥飛于天魚躍于淵侯其尸之其然而然物之生矣時
其殖矣職其宜矣安其居矣神之降依昭假左右霜露
所需罔不在宥

三章章四句

帝高陽氏之樂歌

五莖萬物遂其性而遍諸嘉生也

悠悠上天罔不覆護兮芸芸動殖靡不康阜兮三光全
兮五穀熟兮神顧歆兮吾人昌兮微上帝之功兮疇依
一章章九句

帝高辛氏之樂歌

六英草木暢茂而被其光華也

時雨濛濛自西及東日月所至罔不率從田有黍稷原
有榛栗尊卑秩秩民有家室惟天沖沖惟天崇崇允執
厥中臻於大同

三章章四句

帝陶唐氏之樂歌

咸池德施周普而流於罔極也

鴻惟烈祖啓迪後人皇皇上帝俾予字民民協平康帝
命式臧宅彼陶唐光于萬方萬方億寧亦莫我敢承如
天之運如日之升孰知其極兮不可得而名不可得而
稱

三章二章章四句一章章六句

帝有虞氏之樂歌

大韶能紹帝堯之德而同於無為也

草木繁穠兮陰雨膏之百穀豐衍兮寒暑成之萬物獲
理兮元凱馴之顧否德之弗類兮敢不允躬以承之庶
揖讓以救爭兮傳諸罔極世不乏聖兮惟皇與直俾帝
堯之至公公兮終維斗之不忒

三章章四句

夏后氏之樂歌

大夏美其功利之大而民歌樂之也

於皇上帝臨御有赫洪流湯湯弗降弗辟命於帝庭纂服是膺隨山濬川海寓攸寧五服既宅貢有常職恩覃遐荒惟帝之力元圭告功敢不承式地平天成垂休罔極

三章二章章四句一章章八句

有商氏之樂歌

大濩美其寧亂救民而能覆護之也

維天有光式彼大商俾正以爾萬方萬方其乂易亂為
治至于上下鳥獸草木罔不安遂帝命是膺聖政日新
佑我烈祖以克相爾後人

三章一章章三句二章章四句

琴操

并序

唐韓愈依古述琴操十篇詞存而義不復概見又聲譜
僅可傳其彷彿而莫知其由是故悲思怨刺抑揚折中
皆不切其旨夫所謂操者言其志節之不可以變而衆

人之莫吾知而一歸於時命將感激以自傷寄之於音聲者也大抵皆賢聖憤懣之所為作也今依韓愈先後之次復述十首各冠其事於首篇云爾

將歸操

孔子之趙聞殺鳴犢作

水之深兮可以方舟人之非兮不可以同游斯人斯游吾心之憂

猗蘭操

孔子傷不逢時作

猗嗟蘭兮其葉萋萋兮猗嗟蘭兮其香披披兮胡為乎
生茲幽谷兮不同雲雨之施紛霜雪之委集兮其茂茂
而自持猗嗟蘭兮

龜山操

孔子以季桓子受齊女樂諫之不從因以去魯望龜山
而作

龜之卉兮萋萋龜之雲兮霏霏余之行兮遲遲龜兮龜

兮魯之所依匪顛匪危兮靡扶靡持余之行兮余心其悲

越裳操

周公思文武之勤勞傷時君之德不能致越裳之臣也
彼雲雨兮曾莫之私黍稷繁穰兮草木其宜田野不辟
兮其誰荒之遠人之思兮其誰來之其勤其施惟先君
之思

拘幽操

文王拘羑里所為作也

風入我室兮霜入我衣言不敢發兮聲不敢悲惟皇考
有訓兮余罪之歸余心耿耿兮其知者為誰

岐山操

周公患時黷武思大王之德所為作也

幽之上兮民之所宜幽之居兮民之所依予何為兮尸
之我將全汝兮之岐之陽汝其保寧兮無越汝疆斯歸
斯徂兮其誰之將嗟今之人兮何思何傷

履霜操

尹吉甫子為後母見逐晨行太山下感帝舜之事所為
作也

皇之車兮僕夫馳之皇之輿兮僕夫乘之沉沉廣宇兮
燕雀安之晨羞夕饕誰其眎之親不我思兮我寧不悲
皚皚繁霜兒則履之父兮母兮兒知兒非

雉朝飛操

牧犢子行年七十無妻見雉雙飛感之而作

雉兮朝飛鳴聲相隨朝刷其羽兮夕哺其兒雖有風雨
兮莫或化離嗟余之人兮曾莫汝為

別鶴操

商陵穆子取妻五年無子父母欲其改取其妻聞之中
夜悲嘯穆子感之而作

明月皎皎兮霜風淒淒摧雲翼兮天之涯望昆丘之路
兮不可以同歸子其棄予兮予將疇依月皎皎兮風淒
淒

殘形操

曾子夢狸不見其首感之而作

狸之文兮蔚乎其成章身之孔昭兮而其智之不揚維
元首之昧昧兮而股肱孰為其良吁嗟乎狸之祥兮非
吾之傷兮其誰為傷

松隱集卷一

欽定四庫全書

松隱集卷二

宋 曹勛 撰

古樂府

吳歌為吳季子作

佳人一往兮不來鄰知切國為墟兮莫知儂自守兮誰依

俟河清兮幾時悵姑蘇之崔嵬

楚語為屈平作

瞻荆頰兮盤盤悲淮流兮潺湲彼何人兮獨安此何人

兮獨難悼哲人之不及兮抗靈轡于江干

孔子泣顏回

噫嘻吁天歟人歟回也抑亦子之命歟而其或者天實使之喪予何仁者之不壽而中道之棄兮噫嘻吁回歟回歟其吾道之窮歟

孔子泣麟歌

吁嗟乎麟兮麟兮汝曷來之遲兮唐虞不作兮湯武非來者不可見兮而往者不可追吁嗟乎麟兮非吾之傷

兮而其誰汝為

隴頭吟

古樂府有名無詞因補之

烏落黃雲塞草秋隴頭之水東西流水聲嗚咽嗚啾啾
馬聞思舊櫪人聞思舊丘年年征戰無時休無時休誰
能到此求封侯

兵滿天山雪滿衣漢家都護擁旌旗銜枚一夜襲疎勒
度隴生兵盡潛出不得戎王誓不歸歸時揚柳正依依

正依依占春色與君同醉花陰側

澤畔吟

駕文螭兮翔九天天路遠兮中道還邈故國兮懷所安
心耿耿兮循江干紉秋蘭以為裳兮採杞菊以為餐望
佳人之不來兮暗修途之莫前瞰江流之無垠兮仰蒼
蒼而漫漫想荆門之遐阻兮壽春杳隔于天淵痛靈修
之獨處兮誰復與之寤言氣填膺以拂鬱兮淚承睫而
漣漣悼已往之修繫兮欲易道而改轅顧和璧之三獻

兮冀識者之一觀阻風雨之慘慘兮而夜不得明哀時
運之若此兮余又何默默於久生寧懷沙抱石以自沉
兮庶齋志而下信雖世人之不吾悲兮吾容能不悲夫
若人吾願託夷齊以為紹介兮修請謁于黃虞弔巫咸
于帝閭兮友陽侯於子胥幾江神之不我瀆兮吾容委
質於淵魚已乎已乎其靈修終不得而見乎

白頭吟

并序

昔百里奚去虞傭賃自給秦以五羊之皮贖歸任以國

政後悅秦女而疎其妻司馬相如游宦不遂文君奔之
因其資得極意于文詞及貴悅茂陵女子文君見棄作
白頭吟以傷之

相如素貧賤羽翼依文君一朝富貴擅名價文君見棄
如束薪五穀自傭賃釋褐歸強秦鳴鐘列華屋膳羞羅
八珍厭此糟糠妻悅彼新美人二子既失意瑤瑟流埃
塵促軫不成曲未唱先眉顰一發動三歎淚下霑羅巾
通宵坐披衣夙昔誰與陳愁歎不復道平明白髮新

梁甫吟

并序

昔人有壯歲從軍老而還家窮獨無依晨行泰山下因
疾哀歌以自傷後人感之陸機沈約皆有此作叙時運
流邁君子履信思順悲感之意因申而廣之為變體云
晨行泰山下興懷念梁甫欲往失所從荒途亘今古却
立空踟躕憂來與誰語日暮遵歸途冥冥暗風雨錯漠
傷懷抱僅得依門戶幡然賡長謠培塿隘齊魯何當執
策從鑿旗翼贊登封繼三五

待旦吟

彼幽人兮何所思憂耿耿兮天一涯舉家親屬散百草
關山萬里難追隨更長不寐聽鳴柝寒風蕭瑟如淒悲
安得此身有羽翼脫然避地能孤飛中宵起坐待明發
悄悄側身聽晨雞

纏綿冰雪陰風寒松竹半死相摧殘巖居谷飲蔽荆棘
藤蘿委地難躋攀猛虎志大自羈束易飽不及狐兔安
鷄鳴起舞亦漫興扣角辛苦真可歎堯禹既往小白死

嗚呼吾道何由還幽憂展轉不成卧安得日出開重關

靜夜吟

靜夜何所為坐對一枝燭俯仰徒四隅歲宴靡儲粟春
耕乏良疇秋穫罔芻菽念至輒自營一飯常不足晚食
已多幸况敢望梁肉上無官守累下無征歛促燕坐樂
有餘自足無多欲寄語當塗士吾腰未能曲

除夜吟

夔夔夜漏嚴軍鼓鼓聲入雲雲欲舞寒風負曩頑無聲

野色埋光暗塵土梅花隨臘散鳴笳鳴笳曉色明春圃
春風直莫媚新聲聲斷梅花還作主

夜坐吟

空階夜滴秋宵雨雨入芭蕉動窓戶佳人愁絕坐幽閨
良人萬里勤征戍勤征戍在何處五載乘邊守當路漢
家新築受降城戍卒還家免租賦歸來直莫歎白頭濁
酒狂歌醉朝暮

長夜吟

并序

昔魏公子信陵君招賢下士救垂亡之趙挫虎狼之秦
連諸侯之師西嚮以報秦人固守鼠伏而不敢出安釐
王畏公子之賢遂罷公子兵公子恐近禍因與賓客為
長夜之飲余悲公子之志作長夜吟以申之

舜枯槁堯瘠癯益稷播藝躬耕鋤神禹勤瘁勞體膚子
孫放廢等庸奴一身辛苦踰匹夫孔子稱大聖顏子稱
大儒寢席不暇暖簞瓢困窮廬盜跖飽人肉列鼎吹笙
竽莊躄肆淫虐玉食驅華車人生貴得意孰識賢與愚

白日沉西山烟藹低平蕪悲風攪原隰勁氣摧高梧歌
鐘滿前庭賓客羅簪裾侍女艷流景芳澤揚通衢珍肴
如丘山美酒如江湖賢聖苟如此不醉將何如

智士名不足愚夫樂有餘况復冬夜長風雪迷通衢美
人邀我飲清酒開玉壺明眸艷紅燭流盼光四隅紫風
轉修袂逸響緣綺疏龍香滿珠閣蘭氣生羅襦遺簪復
墮珥笑語相迎扶回頭問公子不醉將何如

苦雨吟

巫山埋空曉光沒寒入風聲散蕭瑟滴瀝深推十二峯
峽江漲白洗青壁羣陰寂寂陽烏搖蕩春愁滿南國
何當羲御駐中天為我驅除風雨黑蜚廉先驅走寰宇
列缺揮鞭起龍虎鬱儀頓轡潛海隅九野冥冥暗風雨
饑鳶跼翅墮曾穹軍鼓無聲如擊缶青苔綠砌上高堂
簷溜侵窓入煙霧南山山叟挂為薪四海橫流阻行路
安有王春四百八十時蕭蕭風雨迷朝暮我願得媯皇
煉石補此破漏天令三光繼明萬物可睹免使百萬億

蒼生憔悴困泥土

空謠吟

抗轡躡飛景攜手仰負羅空謠發新聲羣響隨節和瓊
音動虛籟神宇凌高歌偃蓋滄浪宮整襟翔玉華流目
厭塵袂軒冕卑泥沙咄咄樊籠子胡不餐朝霞他年一
抔土得失奚足誇舍生失天爵擾擾真蓬麻

長吟續短吟

桐花葉密春風老長門路暗迷芳草螢燭流輝露濕光

蟾蜍景落莎鷄曉金烏出谷上蟠桃別院笙簫歌未了
九華烟滿醉楊妃樊姬靜聽雞聲悄舊人且莫妬新人
別有蛾眉更妍巧

續巴東三峽歌

并序

梁簡文帝有巴東三峽歌止存兩句因續而廣之

巴東三峽巫峽長猿鳴三聲淚霑裳月明夜寒寒雨霜
相望各在天一方安得身有羽翼如鴛鴦千里同相將

三峽流泉歌

古詞皆云琴集云初阮咸所作今新而補之

草木搖落兮露為霜
三峽之水兮流湯湯
我欲絕之兮恨無梁
邈佳人兮天一方
明月皎皎兮泉流湯湯

棹歌

并序

李白文集有金陵翫月醉著紫綺裘烏紗巾與酒客數人擢歌秦淮往石頭訪崔四侍御因作擢歌行以紀之
謫仙醉揖金陵月
浩歌目送飛鴻絕
江城樽俎照清輝
樓臺忽作烟霞宅
長杯引竭北斗空
吳歛楚舞無顏色

行行倒著紫綺裘
徑上蘭舟岸
紗幘笑談咳唾驚魚龍
歷塊羣山看滅沒
石頭水底度氷輪
迢迢碾破澄空碧
左回右盼生英風
聯袂招邀盡狂客
相將醉卧綠蘿烟
三山不動鼇無力
秦淮寂寂江月空
人物風流難再得

陽春歌

并序

日月易失徂年不留
壯歲多艱行及衰老
感此良辰歌以見意

草木榮兮春歸
桃李芳兮菲菲
彼日月兮如馳
人生行

樂兮能幾時上林池館變荆棘姑蘇臺榭游狐狸人生
行樂兮能幾時能幾時兮可奈何當歌莫惜朱顏配

漢家離宮三百所高捲珠簾沸蕭鼓車如流水馬如龍
蘭麝飄香入煙雨通衢夾道起青樓金馬銅駝對公府
五侯同日拜新恩七貴分封列茅土玉窻朱戶盡嬋娟
絲竹聲中喧笑語玳筵珠翠照樽壘繼燭臨芳醉歌舞
醉歌舞醉歌舞天長地久無今古

白雪歌

并序

樂府有題而亡詞今補之

白雪如玉皇人壽穀
白雪如霜皇人樂康
還余駕兮歸來覃威德於八荒

秋風歌

蕭蕭兮寂寥勞心兮忉忉
交河水冷驄馬驕良人萬里
從嫖姚羅衣寬盡慵梳掠
翡翠無光香自消

迷樓歌

項昇出南國技巧多淫思
草圖獻天子賞激嘉宏規
瑰

材蔽江海斤斧成風雷千人扶一棟萬棟高巍巍飛鴻
歷層簷雲雨生階墀五彩間金玉百和雜塗泥仙葩粲
楹栱七寶裝雲楣一房百家產萬戶羅東西龍綃開寶
幄簾幕垂珠璣光景艷流日樓閣低天維笙簫動虛籟
絃管明歌姬撞鐘擊鼓恣行樂牙檣錦纜環江隄天長
地久有時盡君王此樂無時衰詎知變故起倉卒不悟
人迷樓不迷君不見始皇愛阿房死葬驪山側煬帝愛
迷樓死葬迷樓北乃知生者魂即是死者魄生死在迷

樓一死良自得只應來夢兒夜夜猶相憶

宛轉歌 并序

按齊諧記云昔晉劉明惠女妙容之所作也

明月皎皎兮江水清促
瑤軫兮寫余情若有人兮
鏘珮瓊申婉約兮揚新聲
託明君之幽怨兮留遲風
以掩抑借餘音于宛轉兮
韻繁諧以周密悵流月之
西傾兮恨彌襟而歎息歌
宛轉兮情無極

吳歌

水滿長洲月滿樓姑蘇臺榭鏤深秋君王不見春花老
響鞞廊中有勝游

楚狂接輿歌

世謂夷齊以為溷兮指箕子而為愚既採薇以餓死兮
又被髮而為奴鑊鋸見棄於鉛刀兮魚目寶於隋珠彼
蜂蛭之隱微兮安能語神岳而觀清都已乎已乎無為
察察而辨璠璣與砮砮

項王歌

古樂府有鮑幾項王詞斷章云悲者騅馬去泣望艤舟
來氣格踰懦不稱因續而起之

提三尺兮臣諸侯手天下兮裂九州時不利兮絕淮流
江雖可渡兮吾何求寧鬪死兮羞漢囚

碧玉歌

南山有桂樹上與浮雲齊上巢雙鴛鴦下合連理枝不
夫亦不傷千載當若斯

三婦艷歌

大婦雙綺襦中婦紅羅裾小婦服翡翠理曲調笙竽良
人幸安坐美酒傾玉壺

大婦織雲錦中婦繡鴛鴦小婦獨無事對鑑理紅粧良
人幸安坐帳暖自添香

團扇歌

白露團玉堦秋風動羅幕御幸各有宜非為君恩薄

嘉游歌

紫殿香風暖珠簾璧月斜閣中調寶瑟門外駐羊車

元丹歌贈會稽陳處士

塵波溢目深溟渤，往古來今空出沒。
喜君相見話丹經，起我凌雲惡阡陌。
我生素乏兒女姿，面上巉巖聳山骨。
少年避地東海隅，架竹編茅剪荆棘。
白雲為我開山容，清風為我翔真域。
旋屬羣寇迫，毆攘淬出青萍閑丹室。
風塵瀕洞十餘年，靈府芝田漸蕪沒。
逢君踪跡類秋蓬，遺我刀圭延歲月。
何當橫槊靜寰區，同子山居論丹訣。
薄暮動弦歌

涼風生晚渚碧草羅夕陰置酒高樓上延月開靈襟
穠粧映桃李楚舞流清音金石閒絲竹逸響飛華林
賓朋盡俊彥然諾輕千金游俠事遐覽倜儻卑陸沉
常恐芳菲歇行樂垂寸心良時難再得有酒須頻斟

松隱集卷二

欽定四庫全書

松隱集卷三

宋 曹勛 撰

古樂府

聖人出

古樂府有題無詞因新而補之

升太微法璇璣闢紫宮清九圍甄符命以膺歷廓氛祲
而建靈旗混車書之文軌兮納民物於雍熙噫嘻惟仁
惟義則吾知其所以能保持

飛龍引

炎精應運開真籙神母誓誓夜潛哭五星同軌莅秦雍
十二真人翔水曲斷蛇約法授天人項籍叱咤徒驅逐
蕭曹翼翼冠元功三十一君兆開國君兮臣兮俱會同
灑掃乾坤開壽域

上雲樂

真王嚴仗衛清道表前旌翠輦浮龍藻霜戈麗虎兵哀
笳鳴廣路警蹕過曹城後乘超王屋前驅上玉京諸天

觀鼓節列聖肅儀刑朝謁虛皇罷麾幢下始青蒐兵寧
紫戶閱籍按黃庭十洲皆承事九宇仰裁成暇豫迎春
宴還宮召百靈綠室陳歌舞陽臺煥日星玉酒浮樽滿
天花覆坐馨空謠洞真唱遐覽悲劫齡俯盼紅塵子起
滅輕浮萍

君馬黃

君馬黃臣馬蒼君馬短臣馬長馳驅不敢先騰驤左右
先後惟其良臣馬勞悴君馬康君馬康無相忘一勞一

逸固所當君馬無逐臣馬強

春風引

建康作

憶昔上國宣和初時平比屋驩唐虞天王禮樂縱游豫
翔風和氣凌天衢蒼龍頌春動時輅晴光彩錯明金鋪
扶晨官師會朝請雜沓劍珮諸侯趨仗移走馬退東掖
聞闐車騎喧傳呼笙簫合沓送歌酒游人買笑捐金珠
太平一百六十載四方面內無征誅歌聲未斷霓裳舞
鐵騎直指墮神都蒼茫萬乘扣軍壘六龍不御驚鑠鐸

陰虹當天變白晝中原化作榛莽區黃旗悠悠渡江漢
百僚竄伏天一隅南極三吳北燕薊西秦東魯無完郭
至今甲歷遍三四生民散盡悲巢烏我每思家限淮水
搖搖心與飛雲孤江城春風漲白浪雞聲可數屋可踰
兵纏九宇無花木憔悴春風空綠燕

日出引

雲冥冥風淒淒綺疏未白雞已啼角聲纒斷闕朱扉闕
朱扉歎朝日君王劍珮朝諸侯赫赫明明光萬國

思歸引

歲崢嶸以高逝兮辰一往而不返夫君胡為乎伏幽陵
而連蹇邈佳人之懷余兮策予馬之不前亘川塗之修
阻以紛錯兮積雪漫漫而蔽天期百舍之不息兮命予
駕而勉旃

筮篋引

行天莫乘龍行地莫乘馬龍馬各有待牽連一時假至
人運獨照八表周神化結交當結心勢利徒夸咤鬼絲

倚喬松纏綿不相舍秋風飛嚴霜榮枯何所藉富貴人
所慕貧賤人所鄙妻嫂薄蘇秦人事古如此游子歸去
來勞生良可恥

日出行

日出東海隅照我草屋東屋東有榮木光彩生曛曛春
草凝碧色秋水生芙蓉江山發深秀和氣翔春風六龍
儼靈轡萬物咸昭融羲和羲和無曠爾職無替爾功使
吾兩目常明兩耳常聰則吾將薦汝於上帝而復子以

以重黎之封

升天行

上智保冲淡練氣固形質精神藏杳冥獨照出寂默三
炁俱混同求死不復得其次崇真功立言與立德軒后
御飛龍旌幢煥晴碧揚許奉丹書凌空佐天職董奉乘
雲輿秦女跨文翼茅山與荆山遺蹤宛如昔旌陽與劉
安雞犬翔真域清虛王陵孫魏膺九錫雲表鳴蕭笳
仗衛嚴霄極即事非荒唐粲然若白黑揮手謝時人緹

山有仙迹

結客少年場行

結客少年場驂騑從驕驪鬪雞橫大道獵騎卷平岡婚
姻聯衛霍賓客紛金張報仇通姓字排難匿行藏功名
看寶劍富貴珥貂璫逸氣凌秋鶡清才負錦囊詎諧驚
四坐議論駭諸郎日暮平康裏花陰醉滿牀

結客少年場橫行靜朔方嫖姚新拜將親選羽林郎百
寶裝犀甲千金飾箭房笑談看匕首博戲賭香囊聚飲

妖姬酒同升射雉堂聯騎絕沙漠分麾入范陽陳前誇
奪槊馬首拜降王歸來辭厚賞小閣醉紅粧

涇溪行

涇溪之水兮猶可以方舟涇溪之人兮不可以同游涇
溪之阻兮猶可以為梁涇溪之險兮石齧吾膺涇溪之
水兮猶可以徒涉涇溪之人兮不可以相接

長安有狹斜行

長安有狹斜芳芳通香轂道逢二少童問君住何曲我

家本神京住近濯龍北長子爵執珪次子為相國小子
無高位校讐在天祿三子俱下來游人住行足三子俱
入門金紫照華屋三子俱升堂戲綵弄絲竹大婦縫羅
襦中婦裁冰縠小婦調鳴箏切切聲相續丈人幸安坐
置酒奏新曲

長安有狹斜狹斜難方軌道逢兩青衣問君住何里我
家銅駝陌高閣通朱邨長子爵通侯次子聯端揆小子
事游俠侖儁卑豪貴三子俱入門軒車羅甲第三子俱

升堂光彩動堦陞大婦理珍裘中婦曳雲帔小婦弄笙簧
黃明粧擁歌妓丈人幸留連雅舞揚清吹

飲馬長城窟行

漢馬飲長城匈奴空塞北樓蘭與烏丸先驅出絕域月
氏合康居受詔發疎勒右校羅天山左出林胡國嫖姚
登狼居旌旗照穹碧號令明秋霜毳帳餘空壁瀚海無
驚波獻捷走重譯大將朝甘泉後部騰沙磧九宇動聲
容功烈光篇籍將軍拜通侯歌舞連朝夕

代北行

漢地山河遠邊城草木長西戎空大夏朔騎送君王禮
樂兼三統車書混八荒征伐司衛霍奉使遣蘇張號令
知無外衣冠入夜郎蒐兵臨瀚海郡縣裂姑臧郵傳通
族障奚奴識憲章華夏同正朔天子坐明堂西極奉龍
馬何用贄白狼

寒風蕭蕭易水紋嫖姚十八為將軍酒酣耳熱氣益振點
羌百萬空成羣兵車鱗鱗動雷轂漢軍霆擊崩屯雲登

封居胥轉瀚海波澄萬里無纖塵六羸夜遁徒苦辛當
時足雪平城恥猶恨逋誅尚有人

釣竿行

昔有伯常子避仇河濱其妻思之為釣竿歌每至河側
輒歌之今補而續之云

臨北坂望南山山長水遠心博博鈎有餌兮緡有竿魚
深潛兮秋水寒念王孫兮何時還

春江行

浦嶼連芳草天桃間柳堤征鴻下天際游女過前溪魚
沒驚帆影林疎見鳥啼王孫聯繡騎童子解香觴吳姬
笑留飲同指畫橋西

艷歌行

陽春麗華旦杲日延清暉庭前天桃花灼灼流芳菲佳
人惜良辰游子行不歸君看天桃花芳菲能幾時

塞北行

五月無芳草經年不見花蒼烟埋古木朔吹卷龍沙猶

逢阿母海愁看白傳
義彷彿南箕下遙瞻望漢家

淮南行

人去宮門寂丹成寶鼎空
砌下苔錢紫庭中霜葉紅
思君聽松籟精魄上高穹

月冷桐陰靜霜紅桂影寒
碧蘚封丹室青松覆玉壇
如何後難犬不得厠驂鸞

青漢謠

鼓策飛晨華翹轡玄景阿
雲裾動星漢流彩鳴玉珂
迢

迢拂青靄俛仰窺負羅羣真儼龍駕拊節揚空歌靈風
翔玉京音響生雲和飛軒出閭闔紫霄高峩峩覽極不
知疲垂足濯天河抵掌談羲黃歷世由經過下盼塵波
中穢濁真棄帑胡為戀浮境出沒相纏紆秦陵一抔土
神室生葭蘆商山高崔嵬名與四皓俱歸來邈雲漢壁
月流綺疏悠然動清興何必騎鯨魚

夢仙謠

夢入蓬萊宮
宮名堯聳聳朱閣靈風翔
紫烟靄鬱生羅幕鸞

鳳棲瑤林咀嚼瑤華萼老龍戲滄洲噴濤盪鱗角朱戶
翳霄暉翠殿開晴廓中有神仙人緩步鏘金鐸顏貌盛
芙蓉舉止何綽約引我丹霞房玉漿金壘酌更賜琅玕
膏笑談同飲啄仙童供蟠桃盛以朱雲絡坐看移三山
驚波沸五岳下顧塵埃徒奔走赴陵壑真人執我手殷
勤相付托若到紅塵中莫染紅塵濁他年須是早歸來
奉迎當遣遼東鶴

步月謠

太清天宇清且高皎然水鑑懸層霄絳河水淺閭風息
蟾光度景搖金鰲仙人縱駕游八極鳳簫歌吹鳴嘈嘈
星宮月殿風馬遠珠華露濕旌旄冷還虛按轡窺塵寰
波裏三山銀浪卷

游仙謠

羽蓋承流景飈輪泛紫霞前旌絳霄隊駐節王母家真
童發清謠雲表翔哀笳樓臺上清漢服綵明珠華萬春
若朝菌歡樂庸可涯瑤席未終醺零落蟠桃花

清晨謠

通夕抱寒衾冥冥暗風雨披衣待平明起履步庭蕪遙
遙望扶桑延目上洲渚陰風驅層雲屯積亘山阜草木
纏淒悲杲日霾天步林鳥雜亂飛修塗限商賈松竹互
摧折鷓鴣肆翔舞四海揚驚濤鯨鯢竟吞吐誰云天步
寬宛足隘環堵殊乖夙昔心媿坐聞無語遲遲攬衿帶
櫛沐正冠屨姑以勤余生疏剔治園圃清晨勞寤歌無
乃思湯武

獨酌謠

我有一樽酒來自故人家故人久相別十載隔天涯相
思不相見對月開流霞一酌延清風清風為我開靈襟
再酌勸明月明光徘徊冷光發三酌望故人明月清風
見顏色高歌起舞麇長謠聲裂金石貫層碧伯倫已死
淵明殂螺贏螟蛉漫充塞須臾歌罷玉壺空醉覺長天
不盈尺

春風著意憐芳草芳草榮時春自老人生歡少別離多

有酒當歌自傾倒莫教憔悴損容光白髮蒼顏為誰好

陽春謠

臨東皇萬物昌君陶唐宣重光臣臯夔熙元良協三辰
撫萬方物無夭札人無傷人無傷繫元良錫以景福滋
穰穰吾君欣欣兮臻樂康

深夜謠

月影移鵝鵲鑪香滿建章君王駐瑤輦宮女出彤房仙
樂浮雲漢笙歌遶畫梁按圖皆國色何處是高唐

花落春猶在人存事已非
草侵迎仗路塵滿舊薰衣
獨立空憐影當歌但斂眉
羞見長門月曾同步輦歸

步月謠

琅玕轉景蒼蚪立露脚斜飛
冷光濕人歸芳草恨迢迢
劍珮生寒秋水澁離離箕斗
正相望流蘇帳合金波入
風前搖袂思沉沉雷雲不動
蛟龍蟄

清晨謠

陽鳥出谷升蟠木幕幕寒烟斂
修竹狐狸竄伏不敢鳴

魑魅深潛翳林麓荷鋤田父下東臯金馬門開轉華轂
何當義御駐中天赫赫明明光萬國

山中謠

山中之樂何由說知者不言言者拙紅塵飛盡散松風
獨酌寒泉弄明月

秋風引

闐闐天門開九重金莖肅肅搖霜風吳江木落龍庭空
雞鳴起舞何忽忽烟塵高翳山闕東邊聲夜入烏號弓

松隱集卷三

欽定四庫全書

松隱集卷四

宋 曹勛 撰

古樂府

青苔篇

陵陸變滄海復作清淺流扶疎藥淵桂先驚蒲柳秋姑
蘇臺未乾坐見麋鹿游秦皇正游覽黃屋指沙丘乃知
晞朝露不必潛蛟蚪桀跖豈庸陋比德慚蜉蝣夷齊苦
葵藿垂譽賢伊周貧賤未必污邪辟深可羞愚智混生

死善惡觀其由昧死尚役役身外滋旁求君不見當年
黎園歌舞人歌聲未歇生白頭及時游行且行樂莫教
日入辭高樓請君試誦青苔篇令君一誦忘百憂

白馬篇

吾家子建袁陽源沈約皆有述作惟道任使驅馳之事
因遂廣之

白馬何翩翩况復值神武逸足看夷由四蹄入風雨右
盼空流沙左歷無全部中夜視房心趣目翻霞舉朝飲

崑崙池夕秣龍川渚毛族空成羣斑駁亦何數神物不
空生寄托遇明主所適無險難要知同彼此歸來脫羈
束飽食曷與粟主人已封侯安步驅華轂

美女篇

芙蓉開綠水青松映海棠新晴沐膏雨艷色明朝陽綽
約彼姝子轉盼流輝光被服妖且妍細浥薔薇香下有
合歡帶繡作雙鴛鴦上有雙同心結作明月璫珠環垂
兩耳翠鳳翹釵梁瓊鈎約雙袖提籠學採桑採桑城南

隅五馬停路傍調笑不一顧但見桑條長歸來候蚕眠
靜坐調笙簧結髮事夫壻誰羨東家王

遠游篇

少年重意氣辭家遠行游高談蔑卿相峻節凌九秋仗
劍謁明主挾策干諸侯衆目寶康瓠明月難暗投驂騑
困短步翻為駑馬羞虛名不足慕抗迹追浮丘至言發
深省遐覽隘九州書功佐天政美惡無不籌麾幢周四
表騎衛羅天駟簫鼓鳴清歌解駕滄浪洲金石易消朽

生死真蜉蝣

浮萍篇

昔作章臺柳今為清水萍
寄托一失所誰分渭與涇
王孫事游冶蘭麝徒芳馨
清晨天桃花灼灼鮮且榮
隨風易零落不及糞上英
萍生八九子滋育常盈盈
芙蓉飾高蓋文藻疏繁纓
寧復事攀折中心無不平

攀龍引

鑄神鼎兮荆之陽
鼎成兮賓帝鄉
君乘龍兮龍高翔
臣

攀龍兮龍髯短龍髯短接君之衣兮臣不敢以手挽君
棄臣兮臣將疇依臣慟哭兮君不知君不知兮可奈何
風雨恻恻兮荆山之阿

方諸曲

方諸限弱水高出扶桑東霞波環玉壘雲幄護青宮珠
臺錦複道寶閣亘飛虹翠節迎瑤輦瓊車駕彩龍羣真
瞻日御列聖從青童朝退聯旌旆杯行奏鼓鐘靈璈激
虛籟雅舞流神風真王拊節和清響流絕空哀歌悲五

濁胡為棲樊籠長生有真訣劫齡安可終

迢迢方諸宮玉闕排霄起扶桑高扶疎森聳數千里碧
樾雜青葱蟠桃映瑤水離離間朱實鳳鳥護丹葉靈風
灑蘭林空歌洞霄紫青童會羣真趣節名揚許安妃從
元君鸞旗翳滄渚翩翩八景輿鳴珂下容與拊手揚玉
音妙響翔天宇真氣淩金石聆之廓丹府靈波濯曜羅
朝元道笳鼓

蕭史曲

玉簫散奇響真氣淒金石招携偶冥會理愜心自適富
貴如朝華况復多得失胡不希長年練氣固形質高舉
凌仙翰雙飛上層碧揮手謝時人去來空役役

秦王卷衣曲

六國斂衽朝秦王秦王宮闕高相望美人充積盈椒房
金珠鉛粉輝煌煌昔為花與玉今為糟與糠感時悲舊
事無意惜年光晝苦短夜苦長朝朝暮暮卷衣裳誰復
正爾恃紅粧

鳴笳曲

江南春草綠江北未開花佳人在何處遷謫寄長沙
漢使通沙漠匈奴過渭橋春風吹客恨千里去迢迢

鼓吹曲

按節臨瀚海舒軍耀朔方幕中延揖客馬首繫降王封
君行負弩天子賜千將後乘騰沙漠前驅過渭陽蕭鼓
通平樂旌旗屬建章明堂獻捷罷甲子自生光

採桑曲

鳴鳩初拂羽桑葉破新萌采采不盈匊攀多力未生春
服浥朝露曉日映粧明語學流鶯巧身同飛燕輕使君
勞借問夫婿自專城

江臯曲

漪連帶修渚遠水明朝暉青山橫倒景畫鷁掩斜扉游
女逢交甫陳思值洛妃菱歌隨棹遠鷗鳥背人飛別有
嘉游處芳樽照舞衣

泛水曲

春服僅能試荷小未成蓮畫舫維青幄平波幕素烟暖
日薰花氣新萍點翠鈿歌吹浮天上旌旗轉座前促粧
留晚景續酒載歸船前驅戒津吏除道候江壖

楊花曲

千里萬里長安道送君思君為君老願為水底石菖蒲
不教零落同百草

採菱曲

修渚通阿閣蘭舟飾翠旗吳姬年十五乘舟泛綠池菱

花羞寶靨皓腕發斜暉行歌擢船去不覺白鷗飛

龍笛曲

美人滿酌金屈卮勸我行樂當及時艷歌流舞揚光輝
揚光輝照春日壽萬春歡未畢

登山曲

并序

非叙離別夸逸豫蓋欲見天下之廣思積累之勤而致
功烈之盛也

禮崇丘陟重嘯省風俗縣寓縣集紛埃鬱葱倩顧秦雍

審伊洛惟前人聲經度保鴻名兮隆德聲陋崇高於羣
岳

夜夜曲

舞衣疊翡翠海月掛珊瑚香滿流蘇幄相迎問醉無

鳳凰曲

帝子舉鳳吹逸響紫回風雙飛翔紫霞駕景凌輕虹戢
影入青靄聲斷彩雲空

綠水曲

春光有餘輝入水可攬結予亦淡蕩人照影空明滅

塞下曲

天聲未暢威窮髮將軍已過長城窟紅旗半捲夜歸來
馬蹄踏碎天山月

秋草黃雲塞馬肥漢家驃騎擁旌旗可能衛霍年年出
不及燕然一片碑

入塞曲

黑水迢迢黑山暮馬鳴蕭蕭夜爭度悲笳四起黃雲愁

角聲嗚咽何悠悠隴山行斷不回首一番回首添白頭

出塞曲

來時長驅五千里滿目烟塵漲天起烟塵已息遼海空
班師來謁明光宮漢家天子耀神武不知戰士常辛苦

楚宮詞

憶昔君王初選時侍兒邀寵學蛾眉而今棄置同衰草
不及章臺楊柳枝

坐待雞鳴報早朝那知別殿困笙簫妾身恨不為鸚鵡

猶恃君王顧盼驕

庭下茸茸碧草齊不知桃李竟芳菲自從侍妾承恩後
忘著迎春金縷衣

漢宮詞

夜漏沉沉度建章千門萬戶鎖深房入宮不識君王面
猶被傍人妬曉粧

鴉鵲樓高百尺層層高元不礙笙簧君王對面如天遠
可笑梅娘不自量

費盡千金寫玉容
冀承恩幸寵深宮
妾心未改君心改
不及天桃媚曉風

春江花月詞

羣芳珠箔映青樓
樓上珠簾捲玉鈎
十二香衢遍羅綺
青樓和月為君愁

花月詞

花光露重春烟濕
鶴去瑤臺人竚立
坐見闌干月脚西
景入長門金鎖澁
花開直莫媚春風
春風代謝如呼吸

明月詞

明月明月出滄溟歷丹闕飛蓋念西園笙歌想南國靈
波如電瀉高丘雲幄和烟鎖空碧人間何事怨別離自
昔循環有今昔今昔雖同事不同昔時宮館今荆棘漢
家陵闕變池塘吳楚江山異南北明月那知古與今治
亂昏明有通塞我願三綱不愆四時不忒天地清寧人
物獲職白兔不見辱子蝦蟆黃髮蒙照臨之大德非明
月之宣功兮則吾何知其為順帝之則

湘妃怨

并序

讀陳羽湘妃怨怪其鄙野為變體三首

委瓊珮兮重淵
稅鸞車兮深山
望蒼梧兮不極
與流水而潺湲

風淒淒兮山之阻
雲冥冥兮湘之浦
落日黃兮明月輝
古木蒼烟號兕虎

雨瀟瀟兮洞庭烟
霏霏兮黃陵望
夫君兮不來
波渺渺而難升

昭君怨

人生無定端萬事固難料美好招世患讒諂過忠告正
淑不自媚私謁事妍笑入宮踰十年嫉妬掩稱道疎賤
難為容况復昧傾巧一朝見排棄衆笑蛾眉好驅車臨
出門盛飾舒懷抱不怨君王遠不怨父兄老唯怨蛾眉
悞一生榮枯不得同百草

再拜升車望已過却教紅粉保山河當時豈止毛延壽
對面欺君事更多

從來貧賤少先容
况復嬌癡入漢宮
一朝掩面辭君去
始悔無金買畫工

盛飾容儀舍掖庭
豈知妍醜悞丹青
不羞見辱單于室
羞見年名作竟寧

婕妤怨

素媿河洲德
寧忘卷耳規
中闈知奉順
外戚敢營私
辭輦翻成妬
能歌復見知
自慚乖嫵媚
不及舞腰兒

春閨怨

著意繡鴛鴦雙雙戲小塘繡罷無心看揚花滿繡牀

秋閨怨

憂勤番作妬險諛自為才趙瑟絃初絕秦箏曲更哀蛛
網羅粧鑑庭蕪暗玉階聽雞雖自悞辭輦却成非猶謝
昭陽月時來照寢衣

閨怨

頭上百寶釵終身不相失唯有鴛鴦席承歡難可畢

玉階怨

堂上臚銀缸閨中下羅幕思君度遙夕長於金井索

幽閨怨

妾年十五從良人良人待旦驅從軍至今遠戍燕山北
但見春歸秋草綠年年塞雁去還來深院無人空綠苔

春日有所思

陽春被華旦草木蒙恩私沉沉幽谷蘭不得同其施女
蘿託喬松光彩紛葳蕤游塵薄雄風光景低鬱儀巖花
落深澗甘為井底泥升沉固難量寧復論高卑人去

已遠良遇安可期
流年易凋落榮盛能幾時
促席具樽酒不醉夫何為

有所思

有所思兮天一涯
彼美人兮安得知
江皋送日下洲渚
心遙目斷征鴻飛
蘭嗟蕙怨芳草歇
春歸猶見霏霏雪
文姬著破去時衣
寂寞愁看漢家月
南箕北斗苦相望
綿綿此恨無時絕

有所思貌何許
乃在洞庭之陽
瀟湘之浦
我欲訪之限

重阻水有吞舟之巨魚兮山有食人之猛虎有所思貌
何許沉沉靜夜愁風雨

遺所思

君行既云遠我思日以長思君無所遺寶帶雙鴛鴦鴛鴦
鴛鴦不相失錦翼游方塘副之玳瑁簪同心復同房上有
金蓮花莖葉相扶將下有並根藕藕絲百尺長同緘尺
素書封以紫錦囊上言長相憶下言莫相忘努力加餐飯
歸來花正芳

思遠人

有美人兮天之涯食蘭菊兮服錦衣披瓊簡兮規天維
隔昆丘之遐阻兮限弱水之漫瀾曾故人之莫吾知兮
曠千載而不歸歲冉冉其將莫兮儼吾駕而不可以徒
回幾道遙於山河思夫君於式微

松隱集卷四

欽定四庫全書

集部

松隱集卷五至八

詳校官庶吉士臣翁樹培

侍讀臣孫球覆勘

覆校官中書臣田尹衡

校對官助教臣汪錫魁

謄錄監生臣沈瑛

謄錄監生臣程元鼎

欽定四庫全書

松隱集卷五

宋 曹勛 撰

古樂府

京口有歸燕

春烟畫白春草綠春水溶溶曲江曲吳宮梁苑盡灰飛
鐵馬驕嘶銜首宿蕭條南國閱春愁章臺瑤室今茅屋
中原民庶被氈裘萬室無人皆鼠伏子歸何處定安巢
楚幕雖多易傾覆感君為君思建章萬戶朱門綴珠玉

當時天下尚無為今日悲涼變何速感君歌為君哭汾
陽已死淮陰族沉沉壯士聽晨雞豺狼當路食人肉燕
齊鄒魯變荆榛番人走馬鳴轡轆

人生不長好

人生不長好倏忽如薜英臨觴莫辭醉既醉莫願醒但
識醉中理無欲醒時名夷齊猶餓死誰復哀屈平陵谷
尚遷滅况乃期促齡已焉謝消長得失秋毫輕

姑蘇臺上月

井序

按吳越春秋姑蘇臺高見三百里下有長洲之苑予往
年訪其遺址有石橋廣數丈其長里許其水通三江長
洲洞庭臺基依山傍有僧寺云

姑蘇臺上月倒景浮天河石梁卧長洲垂虹躍金波叢
薄散蘭麝水底流笙歌歌聲未斷樽前舞越兵夜入三
江浦吳王沉醉未及醒不知身已為降虜響鞞廊前珠
翠橫採香徑裏喧鞀鼓西施和淚下珠樓回首吳宮隔
烟霧姑蘇臺殿變秋蓬荆棘霑衣泣寒露至今風月動

淒涼餘址石橋尚如故

錦石擣流黃

并序

古詞皆云亦不知所起獨煬帝有五言一章以道征戍
室家之思今新而補之

秋風清秋月明征人思婦難為情難為情蟋蟀遠壁鳴
寒聲霜砧皓腕愁不勝愁不勝愁不可剪衣可成夢君
先到黃龍庭

自君之出矣代內作

自君之出矣龍香消寶衣思君共明月千里奉光輝
自君之出矣粧臺生網絲思君拂團扇相與共提携

迢迢高樓入紫烟

迢迢高樓入紫烟上連阿閣巢青鸞青鸞飛飛不復返
朱甍碧瓦空般般而今燕雀互棲止便便飽逸啗鷹鷗
黃金臺廢燕昭死嗟嗟誰復旌遺賢

邯鄲才人嫁為廝養卒婦

落葉逐驚風落花逐流水漂零無定端寄託隨所委朝

榮瑤圃中暮落窮轍裏豈不惡糟糠豈不願羅綺羅綺
閉深宮嫉妬交相靡糟糠守窮廬苦樂同終始行藏宜
自然燕巢茅屋底

上之回

衛騎絕沙漠前驅過玉門雲旗捎月窟輦道屬烏孫萬
國森環衛三靈駭駿奔聲容同日月威德被乾坤巡狩
知無外蠻戎識至尊何當鳴警蹕高會醮崑崙

當置酒

置酒臨芳觀張筵繼落暉選妓調絲竹迎賓奉酒卮月
影移歌扇花光照舞衣霞觴飛白羽高論吐虹霓人生
不滿百行樂當及時當歌期酩酊誰能較是非

將進酒

君唐虞兮臣皋夔將衛霍兮恢邊陲時文景兮民雍熙
獄無寃人兮野無蒿藜玉燭亘天流離以昭兮其惟百
姓日用而不知歌鹿鳴與既醉兮而頌聲洋溢乎康達
顧吾君之清靜躬儉以寂默兮而猶薄滋味與游嬉臣

願得連四海以為席兮酌北斗而為酒卮使五老奉觴上
壽以申祝兮令夫八元夾侍而正儀願聖壽上齊於箕翼
兮其光容充塞於四維醉大道與仁義兮而淳風浹洽
於華夷期億萬斯年兮民皆陶陶而化之慶君臣之嘉
會陋艷鎬與瑤池

艾如張

鴻鵠遠冒繳燕雀戀藩籬爭食蓬蒿下觸網斃禍機黃
雀老且黠黃口小且癡黃雀戒黃口輒莫貪腥肥

遠如期

約指金環瘦不持
羅衣寬盡減腰圍
紅芳坐消歇
王孫歸不歸

反招隱

驂騑天下駿所制在服箱
蘇秦天下辯所失戀冠裳
達人貴自重出處保龍光
山花麗雲錦鳥語調絲簧
清泉激鳴琴掩抑合宮商
芝朮勝梁肉蘭菊有餘芳
白雲結山友來往俱相忘
世路甚谿谷簪笏誠羈縻
人心若丘

山咫尺不可量
猿鶴熟可馴
人熟不可防
留侯從赤松
范蠡辭越王
二子保令終
避世容何傷
王孫促歸軫
吾徒方退藏

獨不見

獨不見誰相憶
花影上珠簾
明月穿窓隙
翡翠暗無光
蒼苔點行迹
鸞鑑掛珊瑚
寶靨銷金碧
彷彿聞簫韶
夢想見顏色
為我報新人
好好承恩澤
君看後庭花
芳菲能幾日

牀前帳并序

晉平虜將軍劉勳妻王宋既嫁二十餘年劉悅山陽司馬氏女以宋無子出之宋於道中作牀前帳以自傷蜀錦牀前帳四角垂香囊上有合歡帶下有雙鴛鴦鴛鴦一分散不得同所將棄捐篋笥裏誰惜舊時香

紫騮馬

紫騮馬出西方徑萬國來咸陽儲精房鍾循良口如米火頭如玉尾輕鬣短龍脊剛蹄圓腕蹙森開張齊平六

齒排截肪目如明星威煌煌驕嘶噴薄思騰驤以華
屋薦露牀金羈玉勒紅錦障鈎膺絡腦垂璫琅漢家驃
騎新開府天子輟賜威遐荒將軍橫槊被金甲矍鑠超
忽踰鷹揚雄鳴矯首厲奔蹙健兒百萬紛披攘登封居
胥轉瀚海軍聲陸訾摧天狼歸來明堂見天子圖形麟
閣宣龍光

王孫游

紅芳開繡戶碧草襯斜陽樓上頻回首思君道路長天

桃與芳草艷色明朝陽思君念華旦賤妾惜容光

烏夜啼

饑鳥啞啞不肯棲雄飛呼雌鳴聲悲娼樓年少醉歌舞
幽閨思婦寂無語將軍百戰未成功坐數更籌聽金鼓
月落啼鳥近鑠窓鑠窓深處繡鴛鴦鴛鴦未就腸先結
馬踏天山夜飛雪歸來且莫話封侯同醉笙歌弄明月

望行人

西北有高樓窈窕入空碧徒倚徧欄干楊花滿行迹不

見行人歸但有揚花白披襟向春風為我傳消息春風
不見知此意無人識

行路難

并序

昔鮑昭王筠皆有此作以叙征戍離別悲感之思因變
而新之

華堂高張千炬燭光溢樽罍艷流目秦姬趙女變新聲
入金石兮裂絲竹少年意氣凌秋陽奴僕金張嗤宋玉
文章富貴何足論胡必直欲身後名顏回風雨困簞食

伯夷葵藿難為情何如嫖姚十八從將軍恩隆愛密收
竒勲美人歌舞謝芳草春花落盡容顏老山長水濶霜
雪寒安用區區涉遠道

又

并序

鮑昭王筠皆有所託其詞閑雅感激惟道閨門離別征
戍懷遠之思因以申之云爾

行路難行路難九折之坂無足歎羊腸劍閣視階闥巫
峽艷瀕無波瀾長安九衢最巖嶮侯門處處深如淵深

如淵不可履翻風覆波當面起况復深宮嚴九重雖有
羽翼無由通行路難行路難不如歸去貧窮靜坐巾柴
關啜菽飲水自行樂雖有風雨無憂患

平聲

歸去來

歸去來歸去來陸行無車水行無船足重繭兮羊腸九
折歷絕嶮而盤盤跼蹐脅息以休影兮石壁屹立而不
可以攀緣上窺不測之天嶠兮而下臨無底之深淵寒
風凜凜以切骨兮朔雪漫漫而漲天孤猿哀吟其左右

兮而猛虎咆哮乎後先緬前路之險阻其若此兮道云
遠而莫前悲已往之勤瘁兮淚流襟而連連歸去來歸
去來吾鄉雖遠兮及此而猶可以生還饑寒迫於屢空
兮庶乎安之若命而終保吾之天年

沐浴子

新沐莫彈冠新浴莫振衣聖人貴同塵賢者汨其泥夷
齊立峻節感激歌採薇子真老谷口歲晏無苦饑屈原
懷獨醒沉湘誰與悲漁父隨其波所適安所宜君看侯

門客饑于紈袴兒

樂未央

并序

古樂府有其名而亡其詞

孝武初封禪羅圖寶歷新開邊擢衛霍儒術用平津禮
樂追三統欽承奉百神高呼寧萬壽歡樂詎容陳

荆門道

荆門道在何許萬里迢迢入南楚故人何事未歸來滿
目豺狼路多阻路多阻兮可奈何矍鑠廉公亦奚取期

君終日醉如泥賢似靈均醒時語

臨碣石

并序

魏武作四章為樂府今亡沈約作五言但叙登臨感遇之旨今為四言三章一章言聖人在上物遂其性二章言樂不可極居安慮危三章言思聖人君子以永成功云

肅我嚴駕登彼絕阪目極天淵曾不知遠曜靈舒光樂彼鯨鯢

杲日既升我徒既盈願言斯適至樂無聲撫躬增媿臨
深可驚

陟彼崇高慨覽遐宇前迹可究興亡可悟安得英雄廓
彼神武澤及飛沉致馨梁甫

巫山高

巫山高望不極飛鴻欲度愁無力我欲絕之乏羽翼峽
江水急荆門遠魚龍游之不能轉下無舟楫上無梁我
欲濟之憂力甚

懷長沙

有若人兮眇何所投蘭袂兮江之澣杜蘅約席兮桂栢
為宇胡為乎終年而在茲前有沅湘之深水兮後有岳
麓之重阻聊逍遙於山阿可以避歲寒之風雨

空城雀

去年已生子今年復生孫主人既昏亂國破家亦焚宮
館變禾黍萬人無一存朝伏蓬蒿下暮宿荆莽間豈不
念儔侶豈不懷玉山儔侶高飛斃繒繳玉山迢遞多鷹

鷓鴣又不見咸陽三月火不滅吳宮萬戶飛灰烟春鴻社
燕尚燒死况復黃口乏修翰喜無挾彈兒空城姑所安
寂寂空城雀日暮寒且饑鼯鼠啼林端豺虎夾路垂蒿
間黃雀語黃口吞聲切莫圖高棲汝不見當年連雲宮
館散烟燎歌臺夾室今狐狸糟丘成糞壤藜藿生酒池
昔人自是不復改今人始覺前人非今人昔人未為遠
更望誰家門戶歸

楚妃歎

日晚章華翠輦歸寂寂深院鎖重扉非緣掩鼻移恩寵
自是新人巧用機

用意十分巧畫眉粧成獨自惜容儀非緣鄭袖能歌舞
自是人心著處迷

霜滿虛庭月滿樓羅帷珠箔閉清秋鑪香烟斷添銀燭
誰道更深睡去休

寶靨香銷翠幄寬更深明月上闌干徘徊踏碎銀蟾影
誰念從來不耐寒

入靜宮深夜漏長深宮漏永憶君王可憐不及秋蒲草
猶得承歡薦寶牀

隴頭水

并序

傷離別倦征戍也

隴頭之水兮不可以濺衣隴頭之雲兮不可以同歸事
行役兮無已時無已時千里萬里從旌旗風雨慘慘兮
寒且饑隴頭之水兮鳴聲悲

莫獨行

莫獨行風雨慘慘兮夜不得明道有石坂兮使汝車敗
而馬驚山有猛虎兮水多暴鯨任重塗遠兮無欲速其
小程莫獨行莫獨行聊可以俟同志之友生

松隱集卷五